

Wallensköld

I.

Nus hons ne puet ami reconforter
se cele non ou il a son cuer mis.
por ce m'estuet souvent plaindre et plorer,
que nus conforz ne me vient, ce m'est vis,
de la ou j'ai toute ma remembrance.
por bien amer ai sovente esmaiance
a dire voir.
dame, merci! donez moi esperance
de joie avoir!

II.

Je ne puis pas souvent a li parler
ne remirer les biaux euz de son vis.
ce poise moi que je n'i puis aler,
car adès est mes cuers la ententis.
Hé, bele riens, douce sanz conoissance
car me metez en meilleur atendance
de bon espoir!
Dame, merci! donez moi esperance
de joie avoir!

III.

Je ne sai tant vers li merci crïer
qu'ele ne cuit que je soie faintis,
que tante gent se sont pris au guiler
qu'a paine ert mès coneüz fins amis.
Ice m'ocit, ice me desavance,
ice me tout ma joie et ma fiance
et fet doloir.
Dame, merci! donez moi esperance
de joie avoir!

IV.

Aucuns i a qui me seulent blasmer,
quant je ne di a qui je sui amis,
mès ja, dame, ne savra mon penser
nus qui soit nez, fors vous, cui je le dis
coardement, pooros, en dotance.
vos poïstes lors bien a ma senblance
mon cuer savoir.
Dame, merci! donez moi esperance
de joie avoir!

V.

Amors, de vos me vueil du tout clamer,
car en vous est trestouz li larrecins.
trop savez bien le cuer d'un honme enbler,
mès du rendre n'est il termes ne fins,
ainz le tenez esmaiant en balance.
Amors, en vous ai fet ma remembrance
de mon voloir.
Dame, merci! donez moi esperance
de joie avoir!

VI.

Chanson, va t'en a Nantueil sans faillance!
Phelipe di que, s'il ne fust de France,
trop puet valoir.
Dame, merci! donez moi esperance
de joie avoir!

- letto 428 volte